



Naleraq

05.10.2022

UKA2022/117

Hans Enoksen, Naleraq

Meeqqanik pinerliisimanginnermut uppersaatinik piumasaqaateqartussaataaneq pillugu Inatsisartut inatsisaata allangortinnera pillugu Inatsisartut inatsisaat.

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera:

Meeqqanik pinerliisimanginnermut piumasaqartussaataaneq inatsisartut inatsisaata allangortinnissaanik siunnersuut oqaaseqarfigissavarput.

Nunatsinni meeqqanik illersuinerup suli annertusartuarnissaa tamatta pisussaaffigaarput aammalu meeqqanik paarsinerlunnerit sumiginnaanerit minnerunngitsumillu atornerluinerit nalaanneqartilugit sukkasumik suliassat aallartinneqartarnissaat pitsaanerulersittariaqarpoq pingaartumik ullut tamaasa pinerluttaalisitsisunik ingerlaannartumik tikinneqarsinnaanngitsut eqqarsaatigalugit.

Meeqqanik pinerliisimanginnermut uppersaatiit uani annertusineqarlutillu aaqqinniarneqartut isumaqatigilluinnarpagut, tassami ukiorpassuarni nunatsinni ajuusaarnarlunnartumik meeqqanik pinerliisarnerit naammattoortuurtarpagut tamannalu sapinngisarput tamaat pinngitsoortinniarlugu inatsisitigut isumannaallisaanerit ingerlattuartaqarput.

Tassanilu inatsimmik allanguinissami qulakkeerlugu ikkunneqartussaqaq meeqqanik pinerliisimanginnermut uppersaatinik pissarsiniarnissaminnut pisussaaffilerneqarnissaat peqatigiffiit suliffeqarfiit ilanngullugit pisussaaffilerneqarnerat iluarisimaarlugu oqaatigissavarput.

Tassungalu ilanngullugu Inatsiseqarnermut Naalakkersuisoq innuttaasut inatsitigut illersugaanerannik isumannaannerulersitsinnissaq anguniarlugu suliniutinik sukanganerusunik atuutsilernissamik eqqarsalertariaqartoq oqaatigerusupparput. Tassami meeqqanik pinerliisarnerit ilaatigut sakkukippallaamik pineqaatissineqartarnerat allangortitariaqalerat.



Naleraq

Nunatsinni pinerluttarnerit ilaatigut sakkortusiartuinnartut eqqarsaatigalugit pineqaatissiisarnerit kisiisa piunnaarlugit allannguisoqartariaqalersoq eqqarsaatissatut apuukkusupparput. Taamatut apuussinitsinnut eqqarsaatissiissut unaavoq, tassalu pinerluttunik pillaasarneq eqqunneqartariaqalersoq ilanngullugu eqqarsaatigisariaqalerparput.

Meeqqat illersugaanerannik inatsisikkut sukateriffigineqarnissaat saqqummiunneqartoq isumaqatigalugu ataatsimiititaliamut suliarineqarnissaa innersuussutigaarput.